

摘藻堂四庫全書薈要

集部

欽定四庫全書薈要

集部

宋文鑑卷十五

七

詳校官候選知縣臣吳甸華



欽定四庫全書薈要卷一萬九千九百三十八

集部

宋文鑑卷十五

宋 呂祖謙 編

詩 五言古詩

新居感詠

杜 衍

無似老且病唯恐歸田遲一旦得引年九天還聽卑尚

霑二品祿俾盡百年期恩深淪骨髓感極橫涕洟始營  
菟裘地來向淮水湄城隅最窮僻匠者寧求奇卜築悉  
由已軒牖亦隨宜外以庇風雨內以安妻兒鷺雀莫羣

噪鷦鷯才一枝因念古聖賢名為千古垂何嘗廣居室  
儉為後人師亞聖樂簞食寢丘無立錐文終防勢奪景  
栢恥家為文園四壁立鄭公小殿移伊余具員者適會  
承平時無術毘萬務無才撫四夷為郡亦齷齪勞心徒  
孜孜保身已天幸拊已宜自知開卷顏間厚復懼來者  
嗤勗哉知止足清白猶可追

幽居即事

杜衍

寂寂復寂寂告老閒居日徑草高於人林鳥熟如客黃

卷不釋手清風常滿室內顧平生心無過此時適

和王校勘中夏東園

晏殊

東園何所樂所樂非塵事野竹亂無行幽花晚多思閑  
窺魚尾赤暗辨蜂腰細樹影密遮林藤梢狂罨袂藩蔬  
足登膳陶秫徑取醉幸獲我汝交都忘今昔世歡言捧  
瑤佩願以疎麻繼

列子有力命王克論衡有命祿極言必定之致覽  
之有感

晏殊

大鈞播羣物零茂歸自然默定既有初不為智力遷禦  
寇導其流仲任派其源智愚信自我通塞當由天宰世  
曰臯伊迷邦有顏原吾道誠一縻彼途鍾百端卷之入  
纖毫舒之盈八埏進退得其宜夸榮非所先朝聞可夕  
隕吾奉聖師言

贈劉潛歸陶丘

石延年

丈夫未大用身與仁義閑可宜更聚散風塵推其顏君  
今歸柯澤路出梁宋間梁宋有吾廬親老待我還矧復

君先歸因君頭應斑春老有時回人老不再少草自有  
時榮髮白不再好人生不如春髮生不如草可堪送別  
春草前青春未老人先老

鄱陽酬泉州曹使君見寄

范仲淹

吾生豈不幸所稟多剛腸身甘一枝巢心苦千仞翔志  
意苟天命富貴非我望立譚萬乘前肝竭喉無漿意君  
成大舜千古聞羶香寸懷如春風思與天下芳片玉棄  
且在雙足何辭傷王章死於漢韓愈逐諸唐獄中與嶺

外妻子不得將義士撫卷起眦血一霑裳胡弗學揭厲  
胡弗隨低昂于時宴安人滅然已不揚匹夫虎敢鬪女  
子熊能當況彼二長者烏肯巧如簧我愛古人節皎皎  
明於霜今日貶江徼多慙韓與王罪大禍不稱所損傷  
纖芒盡室來官下君恩大難忘酒聖無隱量詩豪有餘  
章秋來魏公亭金菊何煌煌登高發秘思聊以攄吾狂  
卓有梅聖俞作邑郡之旁矯首賦虛烏擬彼歌滄浪因  
成答為戲移以贈名郎泉南曹使君詩源萬里長復我



百餘言疑登孔子堂聞之金石音純純自宮商念此孤  
鳴鶴聲應來遠方相期養心氣彌天浩無疆鋪之被萬  
物照之諧三光此道果迂闊陶潛吾醉鄉

四民詩

范仲淹

前王詔多士咸以德為先道從仁義廣名由忠孝全美  
祿報爾功好爵縻爾賢黜陟金鑑下昭昭姪與妍此道  
日以疎善惡何茫然君子不斥怨歸諸命與天術者乘  
其隙異端千萬惑天道入指掌神心出胸臆聽幽不聽

明言命不言德學者忽其本仕者浮於職節義為虛言  
功名思苟得天下無所勸賞罰幾乎息陰陽有變化其  
神固不測禍福有倚伏循環亦無極前聖不敢言小人  
爾能憶裨竈方激揚孔子耳寂默六經無光輝反如日  
月蝕大道豈復興此弊何時抑末路競馳騁澆風揚羽  
翼昔多松柏心今皆桃李色願言造物者廻此天地力  
聖人作耒耜蒼蒼民乃粒國俗儉且淳人足而家給九  
載襄陵禍比戶獨安輯何人變清風驕奢日相襲制度

非唐虞賦斂由呼吸傷哉桑穀人常悲大弦急一夫耕  
幾隴游墮如雲集一蠶吐幾絲羅綺如山入太平不自  
存凶荒亦何及神農與后稷有靈應為泣先王教百  
工作為天下器周旦意不朽刊之攷工記嗟嗟遠聖人  
制度日以紛窈窕阿房宮萬態橫青雲煒煌甲乙帳  
一朝那肯焚秦漢驕心起陳隋益其侈鼓舞天下  
風滔滔弗能止可堪佛老徒不取慈儉書竭我百家  
產崇爾一室居四海競如此金碧照萬里茅茨帝者榮

今為庶人恥宜哉老成言欲擺般輪指嘗聞商者云轉  
貨賴斯民遠近日中合有無天下均上以利吾國下以  
藩吾身周官有常籍豈云逐末人天意亦何事狼虎生  
貪秦經界變阡陌吾商苦悲辛四民無常籍茫茫偽與  
真游者竊吾利墮者亂吾倫淳源一以蕩頽波浩無津  
可堪貴與富侈態日日新萬里奉綺羅九陌資埃塵窮  
山無遺寶竭海無遺珍鬼神為之勞天地為之貧此弊  
已千載千載猶因循桑柘不成林荆棘有餘春吾商則

何罪君子恥為隣上有堯舜主下有周召臣琴瑟願更  
張使我歌良辰何日用斯言皇天豈不仁

書錦堂

韓琦

古人之富貴歸於本郡縣譬若衣錦游白晝自光綸不  
則如夜行雖麗胡由見事累載方冊今復著俚諺或紆  
太守章或擁使者傳歌樵忘故窮滌器掩前賤所得快  
恩仇愛惡任驕狃其志止于此士固不足羨茲予來舊  
邦意弗在矜衒以疾而量力懼莫稱方面抗表納金節

假守翼鄉便帝曰其汝俞建燾往臨殿行路不云非觀  
歎溢郊甸病軀諧少休先隴遂完繕歲時存父老伏臘  
潔親薦恩榮孰與偕衰劣愧獨擅公餘新此堂夫豈事  
飲燕亦非張美名輕薄說紳弁重祿許安閑顧已常兢  
戰庶一視題榜則念報主眷汝報能何為進道確無倦  
忠義聳大節匪石烏可轉雖前有鼎鑊死耳誓不變丹  
誠難悉陳感泣對筆硯

歲晏出沐感事內訟

宋庠

山海有完士希世無良籌偶穿東郭履遂別野人舟不  
恥篆刻賦來肩英俊游私智甚鳧短塵容若鵠愁備員  
太史氏補屬富人侯姑學了官事何嘗分主憂日貪斗  
食利歲感星躔周中都富才彥方駕若龍虬茂先善史  
漢平津治春秋高文用司馬格五寵吾丘間闊路逢葛  
續紛人召鄒桑羊興賈豎安國出繯囚汲鄭貴交盛徐  
陳英藻適況乃天下樞雄雌來九州衣冠徑複道鼓吹  
出長楸席上萬錢箸橋邊八列騶雍容綬魯玦意氣拂

吳鈞咨余良不韙  
瓊覽廁琳璆吹竽昔已濫在梁今可  
尤臺閣魏舒被風霜  
蘇季裘有志謝軒鶴無機防海鷗  
恭族杜陵課誅茅歸故疇

秋日白鷺亭向夕風晦有作

王琪

白鷺敞西軒棟宇窮爽塏千峰若聯環翠色不可解是  
時天雨曠六幕無纖靄金斗熨秋江素練橫衣帶乾坤  
清且斂氣象朝昏改蘆花作雪風飛舞來滄海九霄汀  
鷺起萬里檣烏快月上三山頭鳥沒橫塘外滄茫洲渚



寒銀錯星斗大開樽屏絲竹披襟向簫籟余生本江湖  
偃蹇欣所會清興雖自發苦嗜亦吾累魚龍憑夜濤四  
面忽滂湃安得屏燈然煌煌發水怪

水谷夜行寄子美聖俞

歐陽脩

寒鷄號荒林山壁月倒掛披衣起視夜攬轡念行邁我  
來夏云初素節今已屆高河瀉長空勢落九州外微風  
動涼襟曉氣清餘暖緬懷京師友文酒邈高會其間蘇  
與梅二子可畏愛篇章富縱橫聲價相磨蓋子美氣尤

雄萬竅號一噫有時肆顛狂醉墨洒霧霈譬如千里馬  
已發不可殺盈前盡珠璣一一難東汰梅公事清切石  
齒漱寒瀨作詩三十年視我猶後輩文詞愈清新心意  
難老大譬如妖韶女老自有餘態近詩尤古硬咀嚼苦  
難噉初如食橄欖真味久愈在蘇豪以氣轢舉世徒驚  
駭梅窮獨我知古貨今難賣二子雙鳳凰百鳥之嘉瑞  
雲烟一翱翔羽翮一摧鍛安得相從遊終日鳴噉噉問  
胡苦思之對酒把新蟹

讀徂徠集

歐陽脩

徂徠魯東山石子居山阿魯人之所瞻子與山差我今  
子其死矣東山復誰過精魄已埋沒文章豈能磨壽命  
雖不長所得固已多舊藁偶自錄滄溟之一蠹其餘誰  
付與散失存幾何存之警後世若鑑照妖魔子生誠多  
難憂患靡不罹音羅宦學三十年六經老研摩問胡所專  
心仁義丘與軻揚雄韓愈氏此外豈知他尤勇攻佛老  
奮筆如揮戈不量敵衆寡膽大身么麼往年遭母喪泣

血走岷峨垢面跣雙足鋤犁事田陂至今鄉里化孝悌  
勤蠶禾昨者來太學青衫踏朝靴陳詩頌聖德厥聲續  
猗那羔鴈聘黃晞晞驚走隣家施為可怪駭世俗安委  
蛇謗口由此起中之若飛梭上賴天子明不挂網者羅  
憶在太學年大雪如翻波生徒日盈門饑坐列鴈鵝絃  
誦聒隣里唐虞賡詠訶常續最高第騫游各名科豈止  
學者師謂宜國之皤夭壽反仁鄙誰尸此偏頗不知訥  
諛者又忍加詆訶聖賢要久遠毀譽暫誼譁生為舉世

疾死也魯人嗟作詩遺魯社祠子以為歌

重讀徂徠集

歐陽脩

我欲哭石子夜開徂徠編開編未及讀涕泗已漣漣勉  
盡三四章收淚輒忻懽切切善惡戒丁寧仁義言如聞  
子談論疑子立我前乃知長在世誰謂已沉泉昔也人  
事乖相從常苦艱今而每思子開卷子在顏我欲貴子  
文刻以金玉聯金可爍而銷玉可碎非堅不若書以紙  
六經皆紙傳但當書百本傳百以為千或落以四夷或

藏於深山待彼謗焰熄放此光芒懸人生一世中長短  
無百年無窮在其後萬世在其先得長多幾何得短未  
足憐惟彼不可朽名聲文行然讒誣不須辨亦止百年  
間百年後來者憎愛不相緣公議然後出自然見姪妍  
孔孟困一生毀逐遭百端後世苟不公至今無聖賢所  
以忠義士恃此死不難當子病方韋謏辭正騰喧衆人  
皆欲殺聖主獨保全已埋猶不信僅免斲其棺此事古  
未有每思輒長嘆我欲犯衆怒為子記此冤下紓冥冥

忿仰叫昭昭天書於蒼翠石立彼崔嵬巔詢求子世家  
恨子兒女頑經歲不見報有辭未能銓忽開子遺文使  
我心已寬子道自能久吾言豈須鐫

獲麟贈姚闢先輩

歐陽脩

世已無孔子獲麟意誰知我嘗為之說聞者未免非而  
子獨曰然有如墮應虓惟麟不為瑞其意乃可推春秋  
二百年文約義甚夷一從聖人沒學者自為師崢嶸衆  
家說平地生嶮巖相公益迂怪各闢出新奇爾來千餘

歲舉世不知迷焯哉聖人經照曜萬世疑自從蒙衆說  
日月遭蔽虧常患無氣力掃除浮雲披還其自然光萬  
物皆見之子昔已好古此經手常持超然出衆見不為  
俗牽卑近又脫賦格飛黃擺銜羈聖門開大道夷路肆  
騰嬉便可勦衆說旁通塞多岐正途趨簡易慎勿事嘔  
崎著述須待老積勤宜少時苟思垂後世大禹尚胼胝  
顧我今老矣兩瞳蝕昏眵大書難久視心在力已衰因  
思少自棄今縱悔可追戒我以勉子臨文但吁嘻



喜雨

歐陽脩

大雨雖霽需隔轍分晴陰  
小雨散浸淫為潤廣且深  
浸淫苟不止利澤何窮已  
無言雨大小小雨農尤喜  
宿麥已登實新禾未抽秧  
及時一日雨終歲飽豐穰  
夜響流霖霖晨暉霽蒼涼  
川源淨如洗草木自生光  
童稚喜瓜芋耕夫望陂塘  
誰云田家苦此樂殊未央

飛蓋橋翫月

歐陽脩

天形積輕清水德本虛靜  
雲收風波止始見天水性  
澄

光與粹容上下相涵映乃於其兩間皎皎掛寒鏡餘暉  
所照耀萬物皆鮮瑩矧夫人之靈豈不醒視聽而我於  
此時翛然發孤詠紛昏忻洗滌俯仰恣涵泳人心曠而  
閒月色高愈迥惟恐清夜闌時時瞻斗柄

奉答子華學士安撫江南見寄之作

歐陽脩

百姓病已久一言難遽陳良醫將治之必究病所因天  
下久無事人情貴因循優游以為高寬縱以為仁今日

廢其小皆謂不足論明日壞其大又云力難振旁窺各  
陰拱當職自逡巡歲月寢隳頽紀綱遂紛紜坦坦萬里  
疆蚩蚩九州民昔而安且富今也迫以貧疾小不加理  
浸淫將徧身湯劑乃常藥未能去深根鍼艾有奇功暫  
痛勿吟呻痛定支體胖乃知鍼艾神猛寬相濟理古語  
六經存蠹弊革僥倖濫官絕貪昏牧羊而去狼未為不  
仁人俊又沈下位惡去善乃伸賢愚各得職不治未之  
聞此說乃其要易知行每艱遲疑與果決利害反掌間

捨此欲有為吾知力徒煩家至與戶到飽饑而衣寒三  
王所不能豈特今所難我昔忝諫列日常趨紫宸聖君  
亮舜心閔閔極憂勤子華當來時玉音耳常親上副明  
主意下寬斯人屯江南彼一方巨細到可詢諭以上恩  
德當冬反陽春吾言乃其槩豈止一方云

感興二首

歐陽脩

懷祿不知慙人雖不吾責貧交重意氣握手猶感激煌  
煌腰間金兩鬢颯已白有生天地間壽考非金石古人

報一飯君子不苟得憂來自悲歌涕淚下沾臆

仕宦希寸祿庶無饑寒迫讀書為文章本以代耕織學  
成頗自喜祿厚愈多責挾山以超海事有非其力君子  
貴量能無輕食人食

讀書

歐陽脩

吾生本寒儒老尚把書卷眼力雖已疲心志殊未倦正  
經首唐虞偽說起秦漢篇章已句讀解詁及箋傳是非  
自相攻去取在勇斷初如兩軍交乘勝方酣戰當其旗

鼓催不覺人馬汗至哉天下樂終日在几案念昔始從  
師力學希仕宦豈敢取聲名惟期脫貧賤忘食日已晡  
燃薪夜侵旦謂言得志後便可焚筆硯少償辛苦時惟  
事寢與飯歲月不我留一生今過半中間嘗忝竊內外  
職文翰宦榮日清近廩給亦豐羨人情慎所習醜毒比  
安宴漸追時俗流稍稍學營辦盃盤窮水陸賓客羅俊  
彥自從中年來人事攻百箭非惟職有憂亦自老可歎  
形骸苦衰病心志亦退慙前時可喜事閉眼不欲見惟

尋舊讀書簡編多朽斷古人重溫故官事幸有間乃知  
讀書勤其樂固無限少而干祿利老用忘憂患又知物  
貴久至寶見百鍊紛華暫時好俯仰浮雲散淡泊味愈  
長始終殊不變何時乞殘骸萬一免罪譴買書載舟歸  
築室潁水岸平生頗論述銓次加點竄庶幾垂後世不  
默死芻豢信哉蠹書魚韓子語非訕

感事

歐陽修

空山一道士辛苦學延齡一旦隨物化反言仙已成閒

墳見空棺謂已超青冥尸解如蛇蟬換骨蛻其形既云  
須變化何不任死生

董永

葉清臣

董生少失母老父鰥且貧無田事耕稼客作奉晨昏朝  
推鹿車去大樹為庭藩農家乏甘旨糠粃苟自存父死  
不得藏粥身奉九原人道孝為本畎畝知所尊傷嗟世  
教薄至行豈足論廩祿厚妻子楸枌遺其親靳吝一抔  
土因循三尺墳空令邱壑間凜凜慙英魂



憫農

葉清臣

甲子孟冬予隨牒之吳郡汎舟丹陽毗陵間徐步野次  
周視民田其苗甚豐而穀皆秕問諸穫者則曰是春無  
雨中夏始布秋未及實霜降而秕奔訴諸縣已更季旦  
吏曰農田之制不是過也子姑輸之雖然予卒歲不粒  
矣聞之有感故作是詩

五月雨未沛吾民耕固遲中秋霜早至我稼颯其萎膏  
澤歎苦晚芄苗惜遽衰盈疇皆秕稗卒歲誤京坻國謝

三年蓄人悲一項其編齊陳牒訴奔走失程期縣籍拘  
彘制官征有定規勞歌不可繼為作憫農詩

縣齋對雪

梅堯臣

密雪夜來積起見萬物春山川忽改色草木一以新古  
邑失荒穢王路覆平均從茲慶豐年蹈詠慙小臣

秋思

梅堯臣

梧桐在井上蟋蟀在床下物情有與無節侯不相假寥  
寥風動葉颯颯雨墮瓦耳聽心自靜誰是忘懷者

郭之美忽過云往河北謁歐陽永叔沈子山

梅堯臣

春風無行跡似與草木期高低新萌芽閉戶我未知忽  
聞人扣門手把蟠桃枝問我此蟠桃緣何結子遲但笑  
不復答問者當自推振衣向河朔河朔人偉奇以茲不  
答意遲子北歸時

送王判官之江陰軍幕

梅堯臣

往時初渡江頗愛江南美誰知坐臥間思極煙波裏絮

逐魴魚繁豉添莼線紫君行語風物到日應相似

范饒州坐中客語食河豚魚

梅堯臣

春洲生荻芽春岸飛楊花河豚當是時貴不數魚蝦其  
狀已可怪其毒亦莫加忿腹若封豕怒目猶吳蛙庖煎  
苟失所入喉為鏌鋇若此喪軀體何須資齒牙持問南  
方人黨護復矜誇皆言美無度誰謂死如麻我語不能  
屈自思空吐嗟退之來潮陽始憚殮龍蛇子厚居柳州  
而甘食蝦蟇一物雖可憎性命無舛差斯味曾不比中

藏禍無涯甚美惡亦稱此言誠可嘉

送薛氏婦歸絳州

梅堯臣

在家勗爾勤女功無不喜既嫁訓爾恭恭已乃遠恥我  
家本素風百事無有侈隨宜具奩箱不陋復不鄙當須  
記母言夜寐仍夙起慎勿窺窓戶慎勿輒笑毀妄非勿  
較競醜語勿辦理每順舅姑心况逆舅姑耳為婦若此  
能乃是儒家子看爾十九年門閭未嘗履一朝陟大行  
悲傷黃河水車徒望何處哭泣動隣里生女不如男天

親反由彼

川上田家

梅堯臣

斜光隔河明入照桑柘下  
臯隴生麥苗青青尚堪把  
遠見牛羊歸相親童稚野  
醉歌秋草間頗與世緣寡

送王介甫知毗陵詩

梅堯臣

吳牛常畏熱吳田常畏枯  
有樹不蔭犢有水不溉稌  
孰知事春農但知急秋租  
太守迫縣官堂上怒奮鬚  
縣官促里長堂下鞭朴俱  
不體天子仁不恤黔首逋  
借問彼

為政一一何所殊今君請郡去預喜民將蘇每觀二千  
石結束辭國都絲韁加錦緣銀勒以金塗兵吏擁後隊  
劔撾盛前驅君又不若此輦轡障泥烏徐行問風俗低  
意撫疲駕下情靡不達略細舉其麓曾肯為衆異亦罔  
為世超學詩聞已熟愛棠理豈無

宋文鑑卷十五



欽定四庫全書薈要卷一萬九千九百三十九

集部

宋文鑑卷十六

宋 呂祖謙 編

詩

五言古詩

檢書

蘇舜欽

煩心思所持屏事入小閣  
踣撲下塵梁侈哆張敗笈  
雨爛百數番蟲食三四夾  
軒昂醉墨鬧纖悉新書雜  
魚子或破碎蚕兒尚狎恰  
快心伯長文跋尾清臣搨  
幼辭反知進故句時自愜  
墜亡多玩愛存聚必券帖  
疎密交及

戚前後生與溘誨束儼父師寒暑布兒妾謔浪哭忽還  
私匿情再接愴事涕泠泠憫時歎啗啗一餉誠寂寞千  
里遽會合遊心到句角開眼見茗霅京華歷歷復節物  
念念涉恍爾驚異方遁去乃幾臘回頭厭襞積舉體覺  
疲繭束閣聊欠伸夢斷風一颯

感興

蘇舜欽

後寢藏衣冠前廟宅神主吾聞諸禮經此制出中古秦  
嬴食先法乃復祭於墓漢衣以月遊於道蓋無取宣帝

尊祖廟失制徧九土學元酌前文一旦悉除去魏帝樂  
銅臺遺令置歌舞昏嗣竟從之此事狂夫阻唐制益紛  
華諸陵鎖嬪御曠女日哀吟於先亦奚補吾朝三聖人  
乘雲不可覩威靈已霄漢嗣皇念宗祖繪事移天光刻  
象肖神武徧勅舊遊地輸材起宮宇階城鈿以金墻壁  
衣之黼功既即奉迎法仗疊簫鼓玩好擇珍奇目奪不  
可數三京佛老家已有十數處朝家雖奉先越禮古不  
許君不祭臣僕父不祭支庶丹楹豈非孝聖貶甚蕭斧

大祀當以時寢廟即其所惜哉恭儉德乃為侈所蠱痛  
乎神聖姿遂與夷為侶蒼生何其愚膽歎走旁午賤子  
私自歎傷時淚如雨

哭尹師魯

蘇舜欽

前年子漸死予哭大江頭今年師魯死予方旅長洲初  
聞尚疑惑涕淚已不收舉盃欲向口荊棘生咽喉憶初  
定交時後前穆與歐君顏白如霜君語清如流予年入  
甚少學古衆所羞君欲舉拔萃聲譽日搜搜不鄙吾學

異推尊謂前修今踰二十年迹遠心甚稠後會國南門  
夜談雪滿樓青燈照素髮酒闌氣益適昨君握兵柄節  
制關外侯予才入冊府俄作中都囚飛章力辯雪危言  
動前旒時雖不見省凜凜壓衆媮旋聞君下獄六月送  
渭州渭州舊治所昔擁萬貔貅堂中坐玉帳堂下森蛇  
矛令嚴山石裂恩煦春色浮釁生無根牙衆言起愆尤  
返來入狴犴吏對安可誚法冠巧權詐剝骨不肯抽削  
秩貶漢東驅迫日置郵窮塗無一簪百口誰相調諸子

繼死亡清血漬兩眸貿然幾喪明憤苦結不瘳君性本  
剛峭安可小屈柔暴罹此冤辱苟活何所求人間不見  
容不若地下遊又疑天憎善專與惡報讐二豎潛膏肓  
衆鬼來擲廠棄局奔南陽後事得所投心膽尚卓犖精  
明已彌留生平經緯才蕭瑟掩一邱青天自茫茫長夜  
何悠悠萬物孰不死死常在嚴秋君齒方盛壯衆期樹  
風猷二邊况橫猾四海皆瘡疣斯時忽云亡孰為朝廷  
憂予方編吳氓日自親鋤耰無緣匍匐救兀兀空悲愁

時思莊生言所樂唯鶻鶻物理不可詰此說誠最優

秋懷

江休復

西風萬里至曠然天地秋暮雨生夕涼百蟲鳴啾啾楚  
山曉蒼蒼楚水亦悠悠騷人試登臨感物增離憂所思  
在遐方欲往路阻脩香草有蕙茝嘉樹有梧楸白露委  
芳馨彫零使我愁窮年倦羈窘江湖思舊遊紉蘭製芰  
荷飄泛一葉舟肆情雲水間意適何所求

同持國宿太學官舍

江休復

翳翳雲月薄冷冷雪風清學省夜岑寂天街斷人行廣  
庭層閣陰尋廊步餘明松篠遞遙響如聞絃調聲悠悠  
子佩詩講坐塵埃生迴就直舍休疊疊談道精心會境  
物融泯然遺世營寒眠屢展轉寤言寫素誠

年馳岡閱馬

江休復

牧馬散近垌閱視乘高秋馳岡似涉苑惟阜帶川洲坡  
陲故梁城縈薄西南陬連棚映林樾星羅倚層邱回風  
吹陣雲奔騰歛來游野性脫羈馭飲齧遂所求腹幹頗



肥張鬱怒何彪休羣毆驟麋鹿逸勢凌蛟虬軍戎選輕  
捷和鑾御調柔毛物有千名衆美歸驊騮梁王愁思臺  
佛刹居上頭竭來一憑眺遺墟莽悠悠信陵骨已朽巖  
穴誰見收當時英豪輩事逐東波流置酒臨風軒聊以  
紓煩憂

許希

顏太初

鍼工許希下蔡人住梁門西市三十年及天聖中皇躬  
違豫有內戚達其姓名上召見三進鍼而疾平面授尚

藥奉御其賜予不可勝紀謝恩畢西向而拜上詢其故  
奏曰臣拜本師扁鵲也上惜其用心不忘本給錢五十  
萬立祠封曰靈應侯或曰人生乎世慎乎習希失其習  
者也使希不習醫而習儒其遇主之日不忘先師明矣  
若然則讀書為儒乘時取富貴高冠長劔昂昂廟堂之  
上自負自得不知素王之力者許希之罪人也因為詩  
云

京城名利塗車馬相奔馳其間取富貴往往輸巫醫前

後十數輩身沒名已隳獨有許希者蘊蓄何瑰竒始自  
下蔡來所處尤喧卑西市三十年汨汨無人知一朝仗  
至藝驟登文石墀三鍼愈上疾神速不移時酬以六尚  
官著籍通端闈旌以三品服佩紫垂金龜于時稱謝畢  
西向復陳儀當廳驚且問歷歷宣其辭臣傳扁鵲術遇  
主今得施特此一展謝臣心不自私主上惜其意擊賞  
為噓唏仍給水衡錢國西命立祠復加靈應號金額照  
華棖自此輦轂下求禱何祁祁我過慶成坊見之心且

悲秦醫術雖妙五腑及四肢所習得其人千齡祀不虧  
魯聖術至大帝道與民彝所習非其人一朝反相持小  
吏師荀況竊為辯說資作相勸焚書詐云愚蚩蚩後之  
為儒者其心皆李斯昔在布衣日動守先王規朝談十  
二經夕誦三百詩依憑稽古力榮進無他岐及居廟堂  
上劔長冠我魏自謂天所賦焉知有宣尼宣尼斷襲封  
十經寒暑移他姓為邑官鄉老皆驚疑上章寢不報九  
重遭面欺諫官不舉失御史不言非盡為許希笑得路

忘先師

東州逸黨

顏太初

天之有常度躔次絕乖離地之有常理沉潛無變虧人  
之有常道高下遵軌儀三才各定位萬古永不移二儀  
設有變修德可以祈人道或反常其亂何由支昔在典  
午朝國祚向陵夷日向中夜出赫赫來東陞地向太極  
裂中有蒼鵝飛高厚災且異人妖亦繁滋始有竹林民  
怪誕名不羈次有夷甫輩高談慕無為沉湎多越禮阮

籍兼輔之虛名能飾詐光逸與王尼何曾有先見不能  
救其衰張華徒竭力無以扶其危至今西晉書讀之堪  
涕洟爾來歷千年炎宋運重熙東州有逸黨尊大自相  
推號曰方外友蕩然絕四維六籍被詆訶三皇遭毀訾  
坑儒愚黔首快哉秦李斯與世立憲度迂哉魯先師流  
宥終忘反惡聞有民彛或為童牧飲垂髫以相嬉或作  
概量歌無非市井辭或作薤露唱發聲令人悲或稱重  
氣義金帛不為貲或曰外形骸頂踵了無絲塵聚復優

雜何者為尊卑遙聞風波民未見如調饑偶逢紳帶士  
相對如拘縻不知二紀來此風肇自誰都緣極顯地多  
用寧馨兒斯人之一唱翕然天下隨斯人之一趨靡然  
天下馳鄉老為品狀不以逸為嗤宗伯主計偕不以逸  
為非私庭訓弟子多以逸為宜公朝論人物黷以逸為  
奇家國盡為逸禮法從何施我常病其事中夜起思惟  
平地三尺限空車登無歧重載歷百仞所來因陵遲萬  
一染成俗雖悔何由追衆人皆若夢焉能分其縻衆人

皆若醉不知啜其醺天下皆病痿痺誰就魯醫天下皆  
病狂何暇炙其眉幸有名教黨可與決雄雌所嗟九品  
賤不得立文墀賈誼唯慟哭梁鴻空五噫終削南山竹  
冒死指其疵願乘九廟靈感悟宸心知赫爾奮獨斷去  
邪在勿疑分捕復大索儉人無子遺大者肆朝市其徒  
竄海湄殺一以戒萬是曰政之基千奴共一膽膽破衆  
自隳無使永嘉風敗亂昇平時

贈張績禹功

石介



李唐元和間文人如蠡起李翱與李觀言雄破姦冗孟  
郊及張籍詩苦動天地持正不退讓子厚稱絕偉元白  
雖小道爭名愈弗已卒能霸斯文昌黎韓夫子吾宋興  
國來文人如櫛比黃州十專勝漢公氣全粹晦之號絕  
羣平地走虎兕謂之然駁雜亦文中騏驥曰稹洎盧震  
江沱自為水朱巖兼孫僅培塿對獄時卒能霸斯文河  
東柳開氏嗟吁河東沒斯文乃屯否汨汨三十年淫淫  
滿人耳粵從景祐後大儒復唱始文人如麻立樅樅攢

戰騎徂徠山磊砢生民實頑鄙容貌不動人心膽無有  
比不度蹄涔微直欲觸鯨鯉有慕韓愈節有肩柳開志  
今讀禹功文矛戟寒相倚寶光千里高飛出破屋裏龍  
音萬丈長拔出重淵底雷霆皆藏身日星或失次我慙  
年老人才力漸衰矣禹功氣奔壯今方二十二前去吾  
之年猶有十四歲今讀禹功文魂魄已驚悸更加十四  
年世應絕儔類卒能霸斯文吾恐不在已禹功幸勉旃  
當仁勿讓爾

小孤山

劉 敞

驚波觸南崖反怒射北壁蒼山與相排所謂小孤石蟠  
根萬仞淵聳角百丈碧祠堂豁精嚴行旅進粉澤或云  
婦女神脰蠻頗有迹吾知定名意似欲旌介特流俗失  
其真傳聞莫開釋居人私其利禍福妄損益競為媚妬  
說以誣聰明德先王拱山川禮典有廟食奈何媚於竈  
屈已忘正直吾欲為小孤作書解行客復恐不見從嗟  
哉世多惑

雜詩效玉川體

劉敞

毀巢鳳不至竭澤龍不游賢者有所歸得非龍鳳儔周  
公下白屋聖德被九州趙禹謝賓客漢朝以為優澆淳  
不相襲用舍何其繆苟循一身利不為萬姓謀哀彼杖  
杜詩死生遺道周

雜詩二首

劉敞

鑿井取泉飲上山採薇食豈不信憔悴所願皆我力泉  
也非難致薇也不易得志士恥徒飽衆人苟所獲犧牲

畏芻豢樊籠害羽翼悟理宜在早無為晚更惑  
道薄德亦散功名為時須用力世所賢守正衆云愚智  
者競蒿目小人復爾圖悠悠三季後此風益已渝安知  
治未病舐痔而多車堯舜無名越哉已矣夫

示張直溫

劉敞

築山必使高鑿井必使深百王戒淺近盛德羞浮沉焉  
有尺寸技能棲垂天禽焉有升斗泉能容橫江鱣借茲  
論物理足以開君心嗑在容不足弱在力不任大道如

路然固無古與今

朝乘

劉敞

朝乘日車出暮載星影還顛冥朝暮中出入咫尺間已  
覺素志非更知人理艱小利專欲速大德不踰閑

哀張子厚先生

司馬光

先生負材氣弱冠游窮邊麻衣揖鉅公決策期萬全謂  
言叛羗輩坐可執而鞭意趣小參差萬金莫留連中年  
更折節六籍事精研義農訖周孔上下皆貫穿造次循

繩墨儒行無少愆師道久廢闕模範幾無傳先生力振  
起不絕尚聯緜教人學雖博要以禮為先庶幾百世後  
復覩三王前釋老比尤熾群倫將蕩然先生論性命指  
示令知天聲光動京師名卿爭薦延寘之石渠閣豈徒  
修簡編丞相正自用立有榮枯權先生不可屈去之歸  
臥堅孤嫠聚滿室餬口耕無田欣欣茹藜藿皆不思肥  
鮮近應詔書起尋取病告旋舊廬不能到丹旆風翩翩  
人生會歸盡但問愚與賢借令陽虎壽詎足驕顏淵况

於朱紫貴飄忽如雲煙豈若有清名高出太白顛門人  
俱經帶雲梯會松阡厚終信為美繼志仍須專讀經守  
書一作舊學勿為利祿遷好禮效古人勿為時所一作俗牽  
修內勿修外執中勿執偏當令洙泗風郁郁滿秦川先  
生儻有知無憾歸重泉

今古路

劉敞

出門道路多縱橫不可測我今欲遠行須問曾行客徐  
徐逢路人借問青松側客曰今何往答之遊京國客乃



指要路而言行有益古路雖大道不如今路直但行今  
人路猶如假羽翼彼客別我去獨自躊躇立為見今古  
路信乃無苦忒今路足輪蹄古路多荆棘欲行今人路  
恐背古人跡欲行古人路今人笑迂僻又擬不出門奈  
何饑寒逼哀哀此時路悠悠蒼天色不避今人嫌路須  
行古陌古陌雖然遠且保無蹶失勉哉自勉哉前去難  
之適不獲見楊朱萬古凝愁魄

漢文帝

王安石

輕刑死人衆短喪生者偷仁孝自此薄哀哉不能謀露  
臺惜百金灞陵無高丘淺恩施一時長患被九州

戴不勝

王安石

昔在宋王所皆非薛居州區區一不勝辛苦亦何求懷  
祿詎有恥知命乃無憂此士自可憐能復識此不

司馬遷

王安石

孔鸞負文章不忍留枳棘嗟子刀鋸間悠然止而食成  
書與後世憤排聊自釋領略非一家高辭殆天得雖微

樊父明不失孟子直彼欺以自私豈啻相十百

揚雄

王安石

孔孟如日月委蛇在蒼旻光明所照耀萬物成冬春揚  
子出其後仰攀忘賤貧衣冠眇塵土文字爛星辰歲晚  
天祿閣強顏為劇秦趨舍迹少迂行藏意終隣攘攘外  
逐物紛紛輕用身往者或可返吾將與斯人

楊劉

王安石

人各有是非犯時為患害唯詩以譎諫言者得無悔汾

王昔監謗變雅今尚載末俗忌諱繁此理寧復在南山  
詠種豆議法過四罪玄都戲桃花母子受顛沛疑似已  
如此况欲諄諄誨事變故不同楊劉可為戒

日出堂上飲

王安石

日出堂上飲日西未云休主人笑而歌客子歎以愀指  
此堂上柱始生在巖幽雨露飽所滋凌雲亦千秋所託  
願求久何言值君收乃令卑濕地百蟻上窮鏤丹青空  
外好鎮壓已堪憂為君重去之不使一蟻留蟻力雖云

小能生萬蚍蜉又能高其礎不爾繼者稠語客且勿然  
百年等浮漚為客當酌酒何豫主人謀

我欲往滄海

王安石

我欲往滄海客來自河源手探囊中膠救此千載渾我  
語客徒爾當還治崑崙歎息謝不能相看涕飜盆客止  
我且往濯髮扶桑根春風吹我舟萬里空目存

少狂喜文章

王安石

少狂喜文章頗復好功名稍知古人心始欲老蠶耕低

徊但忘食邂逅亦專城仰慙冥冥士俯愧擾擾甿良夜  
未渠央青燈數寒更撥書置左右仰屋慨平生

今日非昨日

王安石

今日非昨日昨日已可思明日異今日如何能勿悲當  
門五六樹上有蟬鳴枝朝聽尚壯急暮聞已衰遲仰看  
青青葉亦復少華滋萬物同一氣固知當爾為我友南  
山居笑談解人頤分我秋栢實問言歸何時衣冠汗窮  
塵苟得猶苦餓低徊歲已晚恐負平生期

田漏

王安石

占星昏曉中寒暑已不疑田家更置漏寸晷亦欲知汗  
與水俱滴身隨陰屢移誰當哀此勞往往奪其時

送潮州呂使君

王安石

韓君揭陽居戚嗟與死隣呂使揭揚去笑談面生春當  
復進趙子詩書相討論不必移鱣魚詭怪以疑民有若  
大顛者高材能動人亦勿與為禮聽之汨彞倫同朝叙  
朋友異姓接昏姻恩義乃獨厚懷哉余所陳

雜詠

王安石

懷王自墮馬賈傳至死悲古人事一職豈敢苟然為哭  
死非為生吾心良不欺滔滔聲利間絳灌亦何知

謝公墩

王安石

走馬白下門投鞭謝公墩昔人不可見故物尚或存問  
樵樵不知問牧牧不言摩挲蒼苔石點檢屐齒痕想此  
絳長檣想此倚短轅想此玩雲月狼籍盤與罇井邈亦  
已沒漫然禾黍村推藏羊曇骨放浪李白魂亦已同山



丘綯懷蒔蘭蓀小草戲陳迹其棠詠遺恩萬事付鬼錄  
恥榮何足論天機自開闔人理孰畔援公色無懼喜儻  
知禍福根涕淚對桓伊暮年無乃昏

同昌叔賦鴈奴

王安石

鴻鴈無定棲隨陽以南北嗟哉此為奴至性能懇惻人  
將伺其殆奴輒告之亟舉羣寤而飛機巧無所得夜或  
以火取奴鳴火因匿頻驚莫我捕顧謂奴不直噉噉身  
百憂泯泯衆一息相隨入罾繳豈不聽者惑偷安與受

給自古有亡國君看鴈奴篇禍福甚明白

寓言四首

王安石

不得君子居而與小人游疵瑕不相摩況乃禍釁稠高  
語不敢出鄙辭強顏酬始云避世患自覺日已偷如傳  
一齊人以萬楚人咻云復學齊言定復不可求仁義多  
在野欲從苦淹留不悲道難行所悲累身修

周公歌七月耕稼乃王術宣王追祖宗考牧與宮室其  
棠能聽訟召伯聖人匹後生論常高於世復何實

普魯俗所共察察與世違違世有百善一疵惡皆歸就  
求無所得猶以好名譏彼哉負且乘能使正日微  
言失於須臾百世不可除行失几席間惡名滿八區百  
年養不足一日毀有餘諒彼恥不仁戒哉惟厥初

遊土山示蔡天啓

王安石

定林瞰土山近乃在眉睫誰謂秦淮廣正可藏一鰥朝  
予欲獨往扶憊強登涉蔡侯聞之喜喜色見兩頰呼鞍  
追我馬亦以兩黥挾歛書付衣囊裹飯隨藥笈脩脩阿

蘭若土木老山脅鼓鐘臥空曠龔簾雕捷業升堂廓無  
主考擊誰敢輒坡陀謝公冢藏櫛久穿劫百金買酒地  
野老今行饁緬懷起東山勝踐比稠疊於時國累卵楚  
夏血常喋外實備艱梗中仍費調燮公能覺如夢自喻  
一蝴蝶桓溫適自斃符堅方天厭且可緩九錫寧當快  
一捷彼哉斗筭人得喪易矜怯妄言履齒折吾欲刊史  
牒傷心新城埭歸意終難愜漂搖五城舟尚想浮河檝  
千秋隴東月長照西州堞豈無華屋處亦捉蒲葵萑碎

金諒可惜零落隨秋葉好事所傳玩空殘法書帖清談  
眇不嗣陳迹恍如接東陽故侯孫少小同鼓篋一官初  
領海仰視飛鳶跼窮歸放歿高臥停遠蹠牽襟肘即  
見著帽耳纔摩數椽危敗屋為我炊陳浥雖無膏汙鼎  
尚有羹濡策縱言及平生相視開笑靨邯鄲枕上事且  
飲且田獵或昏眠委翳或妄走超躡或叫號而寤或哭  
泣而魘幸哉同聖時田里老安帖易牛以寶劒擊壤勝  
彈鋏追憐衰晉末此土方及業強偷須臾樂撫事終愁

慄予雖天戮民有械無接摺翁今貧而靜內熱非復葉  
予衰極今歲儻與雞夢協委蛻亦何恨吾兒已長鬣翁  
雖齒長我未見白可鑷祝翁尚難老生理歸善攝久留  
畏年少譏我兩咕囁束火扶路還宵明狐兔懾蔡侯雄  
俊士心憭形亦課異時能飛鞚快若五陵俠胡為阡陌  
間蹀足僅相躡諒欲交轡語怯子不能噲

夜夢與和甫別如赴北京時和甫作詩覺而有作

因簡純甫

王安石

水菽中歲樂鼎茵暮年悲同胞苦零落會合尚淒其況  
乃夢乖闊傷懷而賦詩詩言道路寒乃似北征時叔兮  
今安否季也來何遲中夜遂不眠輾轉涕流離老我孤  
主恩結草以為期冀叔善事國有知無不為千里永相  
望昧昧我思之幸唯季優游歲晚相携持於焉可晤語  
水木有茅茨畹蘭佇歸憩遠屋正華滋

獨臥有懷

王安石

午鳩鳴春陰獨臥林壑靜微雲過一雨浙瀝生晚聽紅

綠紛在眼流芳與時競有懷無與言佇立鍾山暝

宋文鑑卷十六



欽定四庫全書薈要卷一萬九千九百四十集部

宋文鑑卷十七

宋 呂祖謙 編

詩 五言古詩

分題得瘿木壺

呂公著

天地產衆材任材謂之智棟桷與楹杙小大無有棄方者以矩度圓者中規制嗟爾木之瘿何異肉有贅生成擁腫姿賦象難取類隲括所不施鉤繩為爾廢大匠睨而往惻然乃有意孰非造化功而終朽不器剝剔虛其

中朱漆為之偽料漿挹酒醴施用惟其利犧象非不珍  
金罍豈不貴設之於楹階十目肯注視幸因左右容反  
見謂奇異人之於才性夫豈遠於是性雖有不善在教  
之揉勵才之不可用由上所措置飾陋就其長皆得為  
良士執一以廢百衆功何由備是惟聖人心能通天下  
志

寄題徑山懷郎簡侍郎

張環

天地一洲渚北平南歌危幽并深以厚江淞清且奇武

林頗英秀川匯仍山卑應接殫天巧類非人力為徑山  
最佳處有巖稱玉芝居防俗士駕地乃賢人宜郎公留  
名德平時為羽儀引年歸故里不復衣朝衣留侯黃石  
心白傳香山期結字名勝外日與塵事違泉石景物狀  
盡在諸賢詩伊予來東藩濫持使者麾平生愛山水弗  
憚命駕之當候秋風高遠造巖下扉澣濯纓上塵散步  
松間綦未能繼高躅聊用慰所思

過介甫歸偶成

曾鞏

結交謂無嫌忠告期有補直道詎非難盡言竟多迂知  
者尚復然悠悠誰可語

劉景升祠

曾鞏

景升得二蒯坐論勝凶殘正當喪亂時能使憔悴寬綬  
紛多士至肅穆萬里安能收衆材助圖大信不難諸公  
龍鳳姿有待久盤桓得一固足興致之豈無端廼獨采  
樗櫟不知取椅檀蓋云器有極在理良足歎

看白雲愛而成詩

狄遵度

秋風吹白雲觸處自何谷初猶半洞門歛出遍巖腹零  
落依水湄片段掛枯木餘影透微白滅跡混空綠煙蘿  
自翳蒼島淑徒縈曲安知蒼梧野下覆猿鳥哭誰能久  
徘徊返顧視黃鵠

哀老婦

李泰伯

里中一老婦行行啼路隅自悼未亡人暮年從二夫寡  
時十八九嫁時六十餘昔日遺腹兒今茲垂白鬚子豈  
不欲養母豈不懷居繇役及下戶財盡無所輸異籍幸

可免嫁母乃良圖牽車送出門急若盜賊驅兒孫孫有婦小大攀且呼回頭與永訣欲死無刑誅我時聞此言為之長歎嗚天民固有窮鰥寡實其徒仁政先四者著在孟軻書吾君務復古旦旦師黃虞赦書求節婦許與旌門閭繫爾愚婦人豈曰禮所拘蓬茨四十年不知形影孤州縣莫能察詔旨成徒虛而况賦役間群小所同趨姦欺至骨髓公利未錙銖良田歲歲賣存者唯萊汙兄弟欲離散母子因變渝天地豈非大曾不容爾軀嗟

嗟孝治主早晚能聞諸吾言又無位反袂空漣如

悠悠西江水送李殿丞

王回

殿中丞李侯清叔筦穎之酒事三年入朝闕下將別其  
往還寮友皆索言焉長樂王回辱清叔之交最深而慕  
其才志魁特將有以成功名於世也以謂挾此才潛此  
志者第循其本而完之則物之應者自廣然功名之成  
否豈足道哉故作悠悠西江水詩一章以興其義塞清  
叔之索而聊寫其意云

悠悠西江水浩浩拍兩涯深澹含淵潭澄澄露陂池介  
鱗育性命跳泳各適宜人謀濟任途航楫又汭洄飄風  
吼天地白浪相翻飀旁觀駭非常水德自不虧風收浪  
還恬狎者終何疑賢豪應世務有本亦若茲剛明發其  
用愷悌以成之外物雖橫來我心固如夷功名豈足道  
請監江水詩

魯恭太師廟

韓維

善教邈無跡其流在民心君看魯太師廟食猶至今豈



如文俗士朱墨坐浮沉趨營止目前不顧患害深去漢  
餘千載此弊竟相尋我行道祠下感激為悲吟不見田  
雉馴啼鵓空滿林

服除送兄弟還都

韓維

日月忽已遠再見新穀升喪期有常數吉我衣與纓俯  
仰自悲吒淚下肝膽崩尚惟立身報未即泯餘生肅肅  
忠憲公秉德輔休明報國有遺意訓言獨在聽况茲世  
厚恩兄弟秩王庭一朝出門去事業各有營上當答君

仁下以為親榮獨此抱病瘳謝喧守柴荆掃冢奉時祭  
復田課春耕既無公家責聊徇狷者情出處雖云異要  
以道為程

靈溝道中

韓維

春風來無迹決莽天地和群生樂時陽衆鳥舞且歌嗟  
爾道旁叟寒餒獨見羅短席不自蔽皮骨撐枯柯呼童  
問所以口噤不得哦所見且如此況餘生齒多吾聞古  
三代仁術固匪他老幼孤洎疾餽養平不頗斯道久寂

冥吾悲其奈何

謁孔先生

韓維

月出高樹枝影動酒樽處樹深月色薄稍以燈火助主人喜我過斟酌亦云屢於時幸無累所談非近務涼風自遠至清景淡吾慮方斯西山秋歷覽陪杖屨

下橫嶺望寧極舍

韓維

驅車下峻坂西走龍陽道青煙人幾家綠野山四抱鳥啼春意闌林變夏陰早應近先生廬民風亦淳好

景仁示去歲所賦菊屏菊塔二詩輒以一篇荅之

韓維

斯民去古遠日與巧偽遷粲粲黃金花揉屈同杯棬列  
屏聳浮圖光彩生盤筵匪惟悅群兒愛詠及華顛我欲  
叱園吏解結除其編萬物有本性各使歸自然

讀書

傅堯俞

吾屋雖喧卑頗不甚蕪穢置席屋中間坐臥群書內橫  
風吹急雨入屋灑我背展卷殊未知心與昔人會有客

自外來笑我苦癡昧且問何為爾我初尚不對強我不  
得已起荅客亦退聊復得此心沾濕安足悔

舉舉媚學子

王令

舉舉媚學子居曰不吾知知而有不能無乃失於欺不  
知未為患不欺浩難期咄哉天下懷何以天下為

呼鷄

王令

鷄呼鷄來前犬吠犬至止夫豈必可名役以食乃爾今  
吾曷為悲人而鷄犬為自計無自存西山謝夷齊

秋懷

王令

撼撼庭樹葉朝零非昔稠  
呦呦草蟲鳴暮急曉未休  
爾蟲無不平豈亦有哀憂  
胡為勞呻吟與士感傷投  
壯士亦何者哀哉與蟲酬  
所抱不列陳調苦難謠謳  
極目有遠見直懷羞曲求  
蒿藜襲久安功名忘前收  
日月忽未幾天地今復秋  
少壯負所懷老大安能謀  
生無及人功死骨埋泉羞  
胡為不奮飛徒與寒餓讐

雜詩

王令

古人重非道饑不苟豆羹有為非其心或不脫冕行如  
何後世人以官業其生鄙哉樂欺人猶以學為名

采選示王聖美葛子明諸友

王令

酒樽厭運行衆客喧已醉忽得簿上籍共出聲名外孤  
昂忽雄軒泯默亦馴致追爭相後先得失自愚智隨時  
有能稱逐釁得訶訾雖非人力為適與天幸值或競以  
禍覆亦有終自遂卒無及物效徒有高人氣回樽變新  
局忽若已異世嗟人久以迷高爵樂自嗜誰為衍衍飽

競逐孜孜利矜驕侈雄奢摧折嘆淹滯昏昏忘所大擾  
擾爭其細安知茫昧間身非天所戲是非未暇辨歡戚  
先已至退之昔裁詩頗以豪橫恃暮年意氣得金玉多  
自慰買居紀廂榮顧影樂冠佩喜將閭巷好特與妻子  
議彼哉何足道進退茲焉係安知九列榮顧是德所累  
寧論聖人為適莫固以義有時曲肱樂不以易富貴吾  
曹頗勉修茲道久自詣何必問浮雲斯理固可視

介亭

孫覺



真人昔未起奔鹿駭四方連延天目山兩乳百里長有  
地跨江海無種生侯王中霄燎穹昊列石表壇場朱旗  
大梁野英氣吞八荒寥寥百年後故物亦已亡所餘彼  
巉巖峰巔屹相望主人承明老星斗工文章築亭紫霄  
上坐客蒼株旁攀雲弄明月曉星生扶桑禹山隔波濤  
簡書永埋藏願逢希夷使水土還故常

讀魏世家

王安國

亶亶談先王古今誰有得施為雖緒餘要在情不匿嗟

彼三代後淪胥入戰國翟璜聞一言俛俛慙李克論材  
稱權衡輕重無物惑吾心能如此乃可任人責

夏日獨居二首

王安國

竹苗敷夏陰蘿蔓蔽朝亮感此節物佳百骸適無恙委  
蛇投廣廈蕭瑟絕遺響稍僿簡編餘俄得冠裾放身雖  
勢利乖心遂弦歌尚默然想聖賢游世無得喪抱關秉  
翟間未分棄冗長人生適意難聊谷安所鄉

又

哲哲池沼儵綠萍隨下上  
鷺鷥堂廡燕白晝容俛仰  
顧我亦晏如環廬花藥長  
無材助太平得地幸間曠  
稍披千古書日覺神明王  
乘間盼物情自適忘外獎  
涵濡覆載仁誰廢魚麗唱  
黃塵洮隴戍黑霧荆衡饒  
奔波暘道邊畢命營邊障  
吾此獨何為飛潛樂能饗  
何時聞解嚴慰彼西南望  
當使少陵翁得見廉恥將

堂上有遺羶

王安國

堂上有遺羶堂下無聚蟻  
但知嗜欲求不必風雨至  
客

方笑營營貪得故無幾安知萬類中趨舍忘彼已天乎  
顧人寰等是一時戲受形巨細分貼患後先爾浸淫虬  
蟬生穴柱從此始莊生亦知言信矣當棄智

忘言

王安國

宋國旌孝子東門毀以斃楚王好細腰後宮餒而殪物  
情信可憐徇外易生死身存寵可誇亡矣安所恃吾今  
思彼哉未足語釋利擾擾智驚愚卑卑學阿世吹噓出  
虹蜺頓挂入塵滓愛憎雖人為榮辱乃天使恩無斯須

懷怨已塞天地百年呼吸中毫髮誰豫已適者默然窺  
陰陽驅意氣始終本何有一息累萬世由來適人適宿  
昔多如此喟余聊自欲安得忘言士

異服

王陶

辛有歎被髮趙靈喜胡服遂成陸渾戎終有沙邱辱用  
夷反變夏亡禮以從俗先王仁義術詎用此求福齊桓  
九合功不以兵車轂仲尼歎微管幾為左袵屬爾來豪  
俠兒往往異裝束耀武何必然禦戎有前躅余敢告司

闕異服宜禁肅

採鳧茨

鄭 獬

朝携一筐出暮携一筐歸十指欲流血且急眼前饑官  
倉豈無粟粒粒藏珠璣一粒不出倉倉中群鼠肥

兵器

陶 弼

五代之真主奸雄何僭偽橫磨閭刀劒白日相篡弑我  
宋有神祖潛德動天意故天意若曰往為我之嗣神祖  
拜稽首乃即皇帝位不惠兆民樂不怒諸侯畏顛倒執

玉帛奔走恐後至大商國三分一朝有其二太宗以義  
撫真宗以仁治王道竹箭直誦聲金鼎沸獨有陰山戎  
時時寇邊地天子赫斯怒大警巡澶衛射殺右賢王遂  
斷匈奴臂狼心帖然服結好同昆弟自此兩河間寂寂  
無戎備卒閑喜夜歌將老貪春睡自此為太平恍逾三  
十歲戎昊乘我間南馳賀蘭騎陽關久夜開樞朽不可  
閉陣雲起秦雍殺氣橫涇渭使臣股慄秦宰相瞋目議  
僉曰亟發兵豎子坑甚易倉惶築邊壘未戰力先瘁逼

迫開庫兵土蝕鋒銳脆防秋採舊屯推轂謀新寄舊屯  
老且死少者無實藝良由不訓練手足迷擊刺新寄將  
家子從小生富貴六韜未嘗讀口但知肉味師復從中  
御進退由閤寺權輕號令冗兩戰無遺類曹公棄七軍  
晉人獲三帥吾兵自此喪有詔新其製此器不預設一  
旦何從致朝廷急郡縣郡縣急官吏官吏無它術下責  
蚩蚩輩耕牛拔筋角飛鳥禿翎翅斡截會稽空鐵烹莖  
山碎供億稍後期鞭扑異他罪愁氛壅太虛霽景晝冥



晦我聞郭汾陽料敵多奇異單箠諭突厥蕃酋膝雙墜  
又聞李西平臨戎有英氣身著紅錦袍懷光肝膽碎是  
知用兵術在人不在器君耳舜高聽君目舜明視願採  
謀略長勿倚干戈銳

送同年蒲叔範察判杭州監

王疇

釋之久未調王粲嘗從軍謂言塞垣事壯氣橫風雲育  
材幸明代薦賢無令君如何漢酤冗沉此荆山珍萍氏  
本幾酒周官有彛倫孝武事攘卻志清天地屯連兵無

時已四海蕭然貧官始操釀具權之飽師人利源一以

洩頽波蕩無垠糜穀費耒耜良藥爭清醇酒禁著律令

犯笞及其身狂藥乃陷牢傷哉堯舜民炎靈屬我后天

資英且仁邦力早雄富漢制仍相循歲賦二十萬經入

固已勤

大農天下酒科  
歲復緡如此

彌年擁武節乘邊清國氛雄雄

百萬師跨邁聯燕秦仰給傾府庫賞賚圖戎勲加歛猶

不足返古當何云杭城東南劇地將湖海隣權利冠天

下旗亭壓重闔彼雖斗筭職亦擇才英臣風露氣已肅

溪潭寒彌新沙榜朝泛泛吳濤暮汙汙南州近牛斗氣  
象雄霜旻汀楓變老枿赤葉晴相紛嘗茶泊幽寺觀魚  
下輕舫行當收翹楚寧復混蒸新無為狎吳叟坐戀秋  
江蓴

四事

邵雍

會有四不赴時有四不出

公會生會廣會醵會  
大寒大暑大風大雨

無貴亦

無賤無固亦無必里閑閒過從身安心自逸如此三十  
年幸逢太平日

高竹

邵雍

高竹碧相倚自能發餘清時時微風來萬葉同一聲道  
污得夷理物虛含遠情階前閒步人意思何清平

巢鳥

張先

鳥啼東南林危巢鷦五六心在安巢枝一日千往復脫  
網得群食入口不入腹窮生俾反哺豈能報成育

臨水

黃亢

人生朝復暮水波流不駐去年昨日水今日到何處惆

悵雨殘花嫣紅隨水去  
花落水東流識盡人生事

次韻和子儀聞蟬

黃庶

落日掛樹間長我亭下陰  
園林動秋意高蟬忽微吟  
清風轉餘聲杳若下遠岑  
微物感時節鏗錡吐商金  
古樂久破碎茲蟲抱金音  
荒忽尚偃蹇激起壯士心  
願為秋蟬操被之朱絲琴

自警

范純仁

憶昔為小官位卑職易營  
朋知喜其勤民口亦見稱中

間忝臺諫已覺言難行然賴識者恕尚謂無欺傾數年  
忽遭遇用大過其能名虛稱不實任重力難勝具瞻不  
可欺舉動招譏評士論因不與自知亦甚明祿厚難報  
答徒茲驕侈萌子孫忘艱難服用饒誇矜清白素風減  
冗長浮費增親舊多責望厚薄貽怨憎貧賤勝富貴古  
語言可憑請病蒙罷免方幸憂責輕俄復統一道撫民  
帥邊兵寇狂適偃蹇民疲未蘇醒勝負繫司命休戚及  
群氓細務委將佐大事稟朝廷所稟有違從委擇有不

精差失雖豪釐致敗或邱陵殞身何足道誤國玷家聲  
可不常惕懼臨淵履春冰庶幾免危溢書此為心銘  
檢覆邾城旱田示同官及寄河南諸賢

劉攽

昔歲歉無年今麥仍荐饑罷民去南畝賤價捐東菑籍  
籍道路間餓者何累累藜藿不克腸滿然旄與倪嗟我  
祿代耕每食為不怡徒懷仲由志身賤那得施屬城上  
民訟比牒皆苦詞奉詔實有無百聞謝一窺星言說桑

田行與父老期觸熱不敢休重趼寧告疲郊原赤如赭  
秉穗無孑遺糞藝不可分四旁生蒺藜流行誠代有愚  
弱豈易欺附上亦有刑殘下罪攸司鄙夫不忍此告吏  
咸赦之庶茲咻噢恩足以蘇惛廢大農急經費言利析  
毫釐二吾猶不足一切寧謂宜國僑敏爭承鄭邑用不  
危馮煖焚券書田氏人若歸區區二小邦兩士能若斯  
當官在必行匪石安可移諸公悉吾友此志良弗非當  
令狗路人一聽狂者詩



雜詩

劉攽

齊有梁丘據晉有樂王鮒據能愛晏嬰鮒欲殘叔譽二  
臣嬖兩朝事君為悅豫景有尚賢志據逆以為助平失  
宥善心鮒乃速其去毋以據為賢易地則同趣丈夫處  
世間必有遇不遇豈無覺者乎正色君亦悟區區嬖幸  
徒何忍就朋附

齊魯

劉攽

齊魯大儒師專門盛章句應物非已長何以責成務乃

其忠孝心足以事君父不如商利徒反道趨詭遇剝床  
以及膚泉貨山嶽聚賜金再百斤封邑成千戶若毋天  
事變豈不厚且固商鞅既誅夷桑羊亦刀鋸寄言逢衣  
人施施幸安步

擬古

劉敞

老萊隱窮楚因與時世隔暮歸恠車轍夜起辟山澤若  
人不可見況肯低顏色安知叢臺下一旦三千客西遷  
竟不還嗟哉莫良畫

漕舟

劉放


漕舟上太倉一鍾且千金太倉無陳積漕舟來無極畿  
兵已十萬三垂戍更多廟堂方濟師將奈東南何

題福唐津亭

陳烈

溪山龍虎蟠溪水鼓角喧中宵鄉夢破六月夜衾寒風  
雨生殘樹蛟龍喜怒瀾慙勤祝舟子移棹過前灘

宋文鑑卷十七



總校官庶吉士臣張能照

校對官中書臣胡紹基

謄錄監生臣邱繹曾

謄錄監生臣劉耀馥